



## **Komunikadu Imprensa 03 Setembru 2020**

### **Konsidera asuntu Demokrásia no Asesu ba Justisa Formál Importante Membu Konsellu Suku Kairui husu JSMP kontinua halo treinamentu iha sira-nia suku**

Ih 27 Agostu 2020, JSMP kontinua hala'o treinamentu ba membru konsellu suku iha suku Kairui, Postu Administrativu Laleia, Munisípiu Manatutu. Materia treinamentu kona-ba Demokrásia no Asesu ba Justisa Formál iha Timor-Leste. Partisipante sira kompostu husi membru estrutura suku ne'ebé mai husi aldeia lima ho total ema na'in 16 (feto 6 no mane 10).

“Treinamentu ne'e nu'udar meiu ida atu bele habelar informasaun no hasa'e koñesimentu membru konsellu suku sira nian ligadu ho demokrásia no oinsá atu asesu ba justisa formál iha Timor-Leste. Nune'e ho mekanizmu ida ne'e, membru konsellu suku sira bele dezempeña sira-nia knaar ho di'ak iha comunidade no tulun comunidade atu rezolve sira-nia prolema tuir dalan ne'ebé loos no apropriadu tuir lei,” dehan Diretora Ezekutiva JSMP, Sra. Ana Paula Marçal.

Iha treinamentu ne'e, partisipante sira husu kona-ba hatun Prezidente Repúblika liuhusi dalan demostrasaun ne'e legál ka lae, entre lei formál ho kultura ida ne'ebé mak vale liu, sé mak tenke garantia direitu sidadaun sira-nian, kazu ne'ebé rezolve iha suku ho konsentimentu husi parte rua bele simu malu ne'e viola lei ka lae.

Hatan ba kestaun kona-ba demostrasaun hodi hatun Prezidente Repúblika ne'e tuir lei ka lae, iha esplikasaun JSMP haktuir katak Timor-Leste nu'udar Estadu Direitu Demokrátiku ida ne'ebé iha garantia ba direitu fundamentál sira liu-liu liga ho liberdade ba reuniaun no manifestaun sira hanesan prevee ona iha Artigu 40 no 42 Konstituisaun RDTL no Artigu 19 no 21 Konvensaun Internasionál kona-ba Direitu Sivíl no Polítika (ICCPR) ne'ebé Timor-Leste ratifika. Aleinde ne'e, iha ona lei própria ne'ebé regula kona-ba reuniaun no manifestaun mak Lei Nú. 1/2006 kona-ba Liberdade Reuniaun no Manifestasaun sira.

Aleinde ne'e, JSMP mós esplika katak ultima desizaun atu hasai Prezidente Repúblika tuir dalan legál mak tenke prinse Artigu 79 aliñea 2 konstituisaun RDTL ne'ebé haktuir katak Prezidenti halo violasaun grave ba konstituisaun no sei hasai nia imunidade husi Parlamentu Nasionál hodi submete ba prosesu iha Tribunál Supremu Justisa no kuandu hetan kondensasaun efetiva, automatikamente nia sei lakon nia kargu nu'udar Prezidente Repúblika.

Enkuantu kona-ba lei formál ho lei informál ka kultura, ida ne'ebé mak vale liu, JSMP haktuir katak lei ka norma rua ne'e vale hotu, maibé bainhira haree tuir ierarkia, lei formál mak aas liu tanba regula ema hotu ne'ebé hela iha teritoriu nasional, enkuantu lei informál ka kultura regula de'it iha comunidade lokál, no norma ida ne'e la hanesan ka ketaketak iha fatin ida ho fatin seluk, nune'e comunidade ne'ebé ketak la iha obrigasaun atu halo tuir.

Enkuantu kestaun sé mak tenke garantia direitu umanu sidadaun nian, JSMP eslika katak ne'e devér ka obrigasaun estadu nian tuir aliñea b) Artigu 6 Konstituisaun RDTL nian ne'ebé haktuir katak Estadu sei garantia no promove direitu sidadaun sira nian, liberdade fundamentál no respeitu Estadu nia prinsipú sira kona-ba direitu demokrátiku.

Iha parte ida kona-ba kazu ne'ebé suku rezolve ona iha nivél suku nian, JSMP eslika katak lei fo dalan atu bele halo konsiliaun ba kazu sira ho natureza krime semi públiku maibé iha kazu krimi públiku sira tenke submete ba iha prosesu tuir lei formál, maske rezolve ona iha suku.

Iha sesaun ikus husi treinamentu ne'e, membru estrutura suku sira konsidera treinamentu loron ida de'it ne'e la suficiente ba sira atu bele kumpriende ho di'ak materia sira ne'ebé JSMP hato'o. Nune'e husu atu JSMP bele kontinua halo treinamentu ba sira nia suku tanba materia sira ne'e importante tebes ba sira.

Entretantu xefe suku, Sr. Roberto Ximenes hateten katak agrade se tebes ba prezensa JSMP hodi realiza treinamentu iha sira nia suku no konsidera materia ne'ebé JSMP apresenta importante tebes no sei útil tebes ba konsellu suku sira iha sira-nia serbisu nu'udar serbidór komidade atu serbisu tuir lei sira no rona ema hotu nu'udar regra demokrátiku hanesan meu importante atu fó solusaun ba prolema sira iha komidade.

Xefe suku ne'e apresia ho partisipasaun konsellu suku sira no husu ba sira atu kontinua fahe informasaun hirak ne'e ba komidade no estrutura suku sira ne'ebé la participa iha treinamentu ne'e.

Programa ne'e hetan apoiu hosi Governu Repúblika Demokrátika Timor-Leste (RDTL) liuhusi Gabinete Apoiu Sosiedade Sivil, Gabinete Primeiru Ministru.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>